

四庫全書

經部

欽定四庫全書

經部

春秋闕如編卷七

八

詳校官監察御史臣劉涓

給事中臣溫常綬覆勘

總校官中書臣朱鈐

校對官中書臣牛稔文

謄錄監生臣沈世玫

欽定四庫全書

春秋闕始編卷七

金山焦袁熹撰

宣公

名倭一作接又作委文公嬖妾敬嬴之子公子遂弑世子惡及其弟視而立之在位一十八年卒

元年春王正月公即位

宣公繼子卒而立與閔公繼子般同宣又長矣是宜

不忍行即位之禮史不書即位者也而今不然者亦猶夫桓公之志云爾然襄仲弑子惡而立宣意蓋以謂子惡不成君不復數之宣直繼文而立居然繼正宜行即位之禮者爾桓則身為弑逆之主而諱若非弑自託於遭喪繼位者之為此又微有不同也但觀春秋書即位則桓宣之惡居然可知也

公子遂如齊逆女

自桓公以來多逆女於齊豈其取妻必齊之姜乎蓋

齊魯並山東大國而魯常為齊弱借二姓之好以為社稷之庇此魯之所以必求昏於齊也今宣公篡立齊惠雖已許之而魯猶懼其來討於是公子遂為宣公謀非與齊為昏不可此如齊逆女所以汲汲也直書其事而情自見矣齊欲親魯故請昏則必與之使魯不貳以為齊利其情亦易見爾嗚呼終去仁義懷利以相接其春秋諸國之謂哉

三月遂以夫人婦姜至自齊

公子翬逆女不言翬以此及叔孫僑如言以者史策

異文其類非一稱婦者本敬嬴而言之

此條本明要說亦無可說

俟辨諸家之說乃可說耳

夏季孫行父如齊

公既與齊昏遂請與齊侯為好會故行父如齊當時所謂安國家定社稷為公室輔者其勛勞不過如此晉放其大夫胥甲父于衛

以胥甲父為有罪而放置諸衛也有罪者謂河曲之

戰不用命也趙穿同罪而見任用者

下侵崇是

以趙盾當

國穿又君壻故庇之而獨罪胥也稱國以放者令出  
晉侯實盾主之如曰晉國有此事云爾史法之常也  
公會齊侯于平州

以篡得國者既列於會則成為諸侯故汲汲為平州  
之會也此亂世之事天王之所必誅聖筆之所不隱  
故曰春秋天子之事罪我者其惟春秋乎

公子遂如齊 六月齊人取濟西田

如齊者拜會之成也取濟西田賂也宣公君臣自結於齊以固其位至是而其事畢也經不言濟西田何緣入齊然其情則有不可得而掩者所謂微而顯也

秋邾子來朝

魯與齊結好故邾人畏之而修禮焉

楚子鄭人侵陳遂侵宋 晉趙盾帥師救陳

此記晉楚爭諸侯之事書楚子鄭人者楚莊將伯中國而鄭人為之從也侵陳者陳常服於楚今靈受盟

於晉故侵之也遂侵宋者宋為中國又有篡奪之惡故移師侵之侵陳而遂及宋亦若齊桓之侵蔡遂伐楚也此見楚莊之師一出而震驚諸夏殆莫能支也諸夏之所以不支者列國既無道而晉為盟主君政不綱大夫承乏彼盛此衰其勢然也陳被兵告於晉晉以救陳出師故獨書救陳也師至陳鄭之間而楚師已復侵宋則盾所帥亦兼救宋而經畧之不悉書也晉趙盾帥師伯主征伐自大夫出亂世之事履霜

堅水馴致可知也

宋公陳侯衛侯曹伯會晉師于榘林伐鄭

晉師盾所帥之師也鄭從楚而侵陳宋故諸侯從晉師而伐鄭也以大夫而主諸侯之盟遂以大夫而用諸侯之師天下之勢于此又一變也

冬晉趙穿帥師侵崇

柳公作

據左氏則崇者秦之與國而晉侵之使秦急崇而因以求成於秦也蓋晉方南抗楚而恐秦之病晉故求

成於秦者晉志也若侵其與國則亦兵家之常爾利  
鈍不足言也趙盾當國而穿又典兵見權重於晉

### 晉人宋人伐鄭

楚方競而鄭從之以衰亂之中國討其即夷之罪宜  
其不能服而且遺之禽也以內晉外楚之義言之雖  
以晉靈之不君趙氏之專政助篡奪之宋鮑而出師  
以伐鄭猶在所與也若以春秋天子之事而言則召  
陵城濮猶不免為罪魁而况爾日之紛紛者乎學春

秋者此之不可不知也

二年春王二月壬子宋華元帥師及鄭公子歸生帥師戰于大棘宋師敗績獲宋華元

大棘宋地是鄭伐宋而宋與之戰也宋有弑君之惡而鄭討之鄭為直而宋為曲然鄭奉楚子之命伐宋宋以中國而受伐宋為內而鄭為外也楚不自出兵而用鄭以攻中國晉亦不自戰而坐視宋之敗衄遂致楚莊得志莫與抗衡彼盛此衰人事得失固可按

籍而知也西國皆以大夫主戰錄世變愈其蓋無其事則無其文既有其事不容不具其文史法之常非經聖筆便須有異也獲者皆生獲之被獲之後容有死者紀其獲時並謂生爾

### 秦師伐晉

大棘之敗晉與有辱焉晉之不競甚矣趙穿侵秦之與國以啟兵端而秦師又至於此見晉之多事而無以宗諸侯也

夏晉人宋人衛人陳人侵鄭

大棘之役鄭倚楚以伐宋敗其師虜其將鄭楚之勢張甚矣晉為是合三國之師侵之其將皆大夫也雖為中國伯主討伐之事而名義威力俱無足言故書辭從畧如此也

秋九月乙丑晉趙盾弑其君夷臯

公作臯

盾專政日久主諸侯之盟會名雖為大夫而實疑於伯主晉靈昏暴心忌盾而欲殺之君臣之際勢無兩

全靈若殺盾晉國亦亂靈之不君不假言矣無道之君人莫為用枋政之臣羽翼既多得為之備故盾竟免於死而弒逆之謀于是焉作也盾既懼禍及又以殺老牛莫之敢尸故身辟於外俟其亂作而後敢返國以為非我之弒之也君實不君國人欲殺之遂致此禍也趙穿之攻桃園由盾指使與否不可知然穿之為此則實為盾也亡不越境返不討賊盾之心事已自可見即與指使不殊故書曰趙盾弒其君也春

秋之時君臣之義不明直以盾之此舉為有勞於社稷而前後功足相覆故假為孔子之言以曲庇之而後世猶以盾果為良臣實無弑君之心而橫被惡名也是則孔子作春秋以懼亂賊而左氏之徒反為之開一面之網使猶得以自容於天地之間也嗚呼盡信書不如無書孟子於武成且然況傳家之說哉

冬十月乙亥天王崩

三年春王正月郊牛之口傷改卜牛牛死乃不郊猶三

望

魯之郊禘非禮也自當日行之則為常事唯有變異廢不修者則書之郊牛之口既傷不復可用故改卜牛而牛又死似若天意不欲郊者因遂暫廢郊祭有郊則有望雖不郊而猶三望不全廢之此錄當時事實曰乃曰猶皆史文當然爾郊祭不在此月以牛傷卜牛當在郊前故正月而遇此異遂詳錄其情以不郊猶望了之今但據經文觀之則天王崩問至而宣

公不往自以即位三年議舉郊祀大典及牛體或傷  
或死乃不復郊而太山河海之祭猶行之如故也蓋  
其是非得失歷歷具在編中一聽後人之公議所謂  
直書之而義自見者也

葬匡王

王室微弱葬天子或緩或速諸侯莫有至者魯亦但  
使人會之而已此類但據經文自可見

楚子伐陸渾之戎

公作賁渾公  
穀皆無之字

陸渾戎密邇王畿楚子伐之書者見楚之盛強而中國之不競其勢益甚也

夏楚人侵鄭

鄭叛晉而即楚既而與晉盟故楚人侵之

秋赤狄侵齊

皆居中土之狄也或為赤或為白其種不同孔氏以為俗尚赤衣白衣也

宋師圍曹

據左氏武穆之族以曹師伐宋至是圍曹討其助二族為之出師也惡在宋人不假言也

冬十月丙戌鄭伯蘭卒 葬鄭穆公

葬上無月此其最著者蓋雖速不應便在卒月故知脫矣

四年春王正月公及齊侯平莒及鄭莒人不肯公伐莒取向

莒與鄭有怨莒素屬齊鄭當屬魯魯齊方睦故公及

齊侯平莒及邾欲令二國釋舊怨更相好也莒人不肯者邾從公欲與莒平而莒恃強違命也公為是怒而伐莒取其邑而還必書平莒及邾莒人不肯者史臣之辭見伐莒之師由莒人自致也春秋備錄其文以存當時大小諸侯行事之實則所謂春秋天子之事者義已在其中矣

### 秦伯稻卒

秦自康公以來使命通於上國而邦交之禮猶畧也

故但書卒而已

夏六月乙酉鄭公子歸生弒其君夷

公子宋將弒君謀諸歸生歸生懼而從之於是弒其君夷歸生不從則夷不死如秦之斯高高謀於斯而斯不從則扶蘇不殺胡亥不立故歸生之弒君非固歸之獄也夷之死實歸生使然也雖然春秋之文從彼國赴告書之用見世衰道微君不君臣不臣篡賊之跡累累而見可憫傷甚爾豈以蔽罪一人而便赦

其餘不復問之乎如公子宋之流名字不一一見經  
正以春秋之旨舉其大綱故也讀者幸無惑於斯焉  
赤狄侵齊 秋公如齊 公至自齊

宣為齊所立故事齊尤謹歸而告廟書至備文見魯  
勢至此彌復衰劣爾

冬楚子伐鄭

楚圖伯急必欲得鄭乃已故再伐之

五年春公如齊 夏公至自齊 秋九月齊高固來逆

叔姬

公穀作子叔姬

公比年朝於齊而齊之卿佐請婚於公來逆叔姬公為之主是以齊卿當魯君魯為齊屈若是甚也凡此皆因其事實而書之其所以致是者可考而知也明鏡在懸物無不照其春秋之謂矣

叔孫得臣卒

舊史無自非孔子削之

冬齊高固及子叔姬來

春秋錄魯宣齊惠結好之迹以及高固叔姬成婚之事所以著當時之情志初無微辭隱義可言而所謂刺譏貶絕云云者固已在其中矣高固以秋逆叔姬不逾歲而與叔姬俱來自是有乖常禮然謂書此示譏則聖人之意疑若不專乎此要當以比事屬辭之體求之可爾

楚人伐鄭

三書伐鄭見鄭猶未服楚楚猶未得志也

六年春晉趙盾衛孫免侵陳

此錄晉楚爭諸侯之事陳畔晉而即楚故侵之楚與晉爭鄭而未得鄭晉與楚爭陳亦未能令陳服從而  
不貳此見中國之伯無能為之甚也

夏四月

秋八月螽

公作  
螽

冬十月

螽為苗稼害而冬不書饑其不甚與

七年春衛侯使孫良夫來盟

魯宣之篡立也齊有力焉宣專與齊比而不復事晉

晉方與楚爭諸侯而魯恃齊以苟安褻然若不聞也  
今晉欲為黑壤之盟求諸侯之不至者宜莫如魯矣  
衛方睦於晉趙盾侵陳而衛從之衛侯之意欲使魯  
列會同心事晉外楚故前定為此盟而孫良夫銜命  
以來也書衛侯使者見此盟由衛侯意也凡此皆見  
列國一時事勢無褒美之可言也

夏公會齊侯伐萊 秋公至自伐萊

齊欲伐萊徵魯師公會齊侯伐之從齊志也

大旱

非常旱也為災可知

冬公會晉侯宋公衛侯鄭伯曹伯于黑壤

晉成之立於今年始克徵諸侯會於黑壤魯久不事晉至是始往會之鄭介晉楚間惟強是從而今棄楚即晉則此會之有盟其必然者而經但書會不書盟左氏以謂晉人止公以賂免史諱之故也然經文所無學者疑之今亦未有以見其必然也或經文偶

脫盟字未可知爾

八年春公至自會

夏六月公子遂如齊至黃乃復 辛巳有事于大廟

仲遂卒于垂

壬午猶繹萬入去籥

自黑壤會晉還不能一歲再出故但使卿聘于齊遂既受命而出雖遇疾不應輒自返今遂至黃而復是廢人臣禮其所由來漸也視公孫敖之奔莒一間爾

魯君是時方有事大廟而仲遂凶問適至卒於垂者  
尚未離齊竟故書其地也祭之明日有繹今聞鄉之  
喪仍不廢繹萬舞如故但去籥惡其聲達於外故去  
之進退失據是謂非禮之禮舉動有乖於常故備錄  
之用見秉禮之國迄於衰亂乃有此等之事矣卒而  
書仲遂者其後為仲氏猶季友卒後為季孫氏也此  
不言公子者蒙上從省文爾

戊子夫人嬴氏薨

公穀作  
熊氏

文公夫人姜氏子弑身歸於齊宣公為君則以其所  
生母為夫人焉於其卒也書夫人嬴氏薨其葬書我  
小君私其所親如成風故事也然僖以哀姜為夫人  
是先君有二夫人也宣直不以姜氏為夫人而夫人  
此嬴氏也則又甚矣

晉師白狄伐秦

晉主夏盟而世與秦為仇其有戰爭之事則書之白  
狄介晉秦之間會師伐秦狄為晉用也凡此並錄其

事實不以比狄為譏

楚人滅舒蓼

穀作鄆

晉方有事於秦而楚人蠶食之勢勃焉未已中國諸侯於是懼也此春秋比事屬辭之意舒蓼如舒庸舒鳩之類非兩國名

秋七月甲子日有食之既

日食之災既為尤大

冬十月己丑葬我小君敬嬴

公穀作頃熊

雨不克葬庚寅

日中而克葬

卜葬本以己丑是日雨其故不克葬至庚寅日中而克葬史錄其實也書葬我小君者反哭成喪全用夫人禮也

城平陽

平陽魯邑非時而成之必有所備而勢不容緩者今不可考也

楚師伐陳

陳即晉楚師伐之旋服於楚此見楚強也

九年春王正月公如齊 公至自齊 夏仲孫蔑如京

師

自黑壤之會還僅一年不親朝齊以上卿往聘而不卒事旋遭故嬴之喪則齊固亦無望於魯也至是春正月公如齊雖在喪不敢不如齊也夏使仲孫蔑聘京師所以事天子之禮如是而已此見王室之衰諸侯知有大國不知有天子謀國者莫不以為是固應

爾而其漸之來已久其勢之成將愈甚而不可挽也  
春秋遇其事則直書之而撥亂反正之道在其中矣  
齊侯伐萊 秋取根牟 八月滕子卒

根牟闕疑○滕小國生朝卒赴皆降稱子史臣從其

所自稱書之

所謂辭  
從主人

九月晉侯宋公衛侯鄭伯曹伯會于扈 晉荀林父帥

師伐陳

晉成會諸侯凡二聊以修伯職也是時齊魯自為一

黨不與晉通陳鄭在晉楚間鄭服晉而陳不至此伐陳之師所由興也據事錄之無褒貶之可言諸侯在會而命將伐國謂之政在大夫亦未然也

辛酉晉侯黑臀卒于扈

晉成之卒不書葬蓋魯恃齊不遣卿往會之

冬十月癸酉衛侯鄭卒 宋人圍滕

滕方有喪而宋圍之書此見中國諸侯不道之甚

楚子伐鄭 晉卻缺帥師救鄭

楚子伐鄭必得鄭而後已楚勢張也晉卻缺救鄭晉  
新喪君猶能勤諸侯也然救鄭而終不免於失鄭晉  
伯之衰可知也

陳殺其大夫洩冶

公穀  
作泄

如左氏穀梁所云洩冶以諫死是忠正之臣不幸遭  
昏亂之世以罹此灾也春秋之書重在錄無道之跡  
見列國放恣之甚以私怒專殺大夫聖王討伐所當  
加至於被殺之臣有罪無罪直無文以見之蓋急正

其大綱而已屑屑然褒之貶之于一字兩字之間別  
異其文非聖意之所及也稱國以殺有罪無罪書法  
從同說春秋者宜致思焉

十年春公如齊 公至自齊 齊人歸我濟西田

公連年朝齊二君相親厚甚公在齊日以舊所畀濟  
西田請於齊侯齊侯許之公既還國而齊使來致此  
田言歸我者以濟西田歸於我我者內辭也元年取  
此田不得言我賂之是年歸我不得言我求之凡此皆

書法當爾勿以刻深求經意可也

夏四月丙辰日有食之 己巳齊侯元卒 齊崔氏出

奔衛

君始卒而臣下有被逐出奔之事國內惟攘大臣不相能衰亂之跡著矣書崔氏者從來告辭其是崔杼與否當闕之

公如齊 五月公至自齊

奔惠公之喪也

癸巳陳夏徵舒弑其君平國

殺其大夫洩冶是君之惡也弑其君平國是臣之惡也君不君臣不臣有王者作其能免於誅討乎弑君者實徵舒則書其名不以君有道無道為義

六月宋師伐滕

滕為宋私久矣九年圍滕至是復伐之傳以為滕事晉而不事宋故也書者見諸侯相凌暴也

公孫歸父如齊 葬齊惠公

歸父仲遂之子嗣為卿者也

晉人宋人衛人曹人伐鄭

前年楚子伐鄭而晉出師救之鄭及楚平故復以諸侯之師伐之然終不能使鄭不為楚得也故四國書人若曰無足道焉爾

秋天王使王季子來聘

諸家各為一說愚以為闕而不論可也王靈之不振列國之無王即事可見亦不假於言矣

公孫歸父伐邾取繹

公作類

宋以滕為私屬則數數加兵於滕魯以邾為私屬則數數加兵於邾伐邾而取其邑貪兵也

春秋諸侯不道多相似也

大水

冬書饑則災重可知也

季孫行父如齊 冬公孫歸父如齊

行父如齊頃公立故也歸父復如齊傳以為伐邾懼討故也聘齊之使旁午於道魯君臣之結好於齊惟

恐不至亦可見矣

齊侯使國佐來聘

頃公立未踰年在其國內宜稱子而他國稱之則曰齊侯魯史之文自宜然爾不云齊國佐來聘者欲見二國君相親重之甚也

饑 楚子伐鄭

十有一年春王正月 夏楚子陳侯鄭伯盟于辰陵

穀作

夷

楚莊得陳鄭而伯事成楚主是盟陳鄭二君為其私屬先楚子者依事實而書之晉楚狎主齊盟天下之勢變而愈下自非命世之才莫能挽回而一正之謂聖人惓惓責望於當時之君大夫者抑可謂愚而鮮量矣

公孫歸父會齊人伐莒

楚方爭伯而齊自伐莒魯卿會之從齊命也

秋晉侯會狄于欒函

狄君在欒函而晉侯自往會之晉自為邊圉圖安靖  
未暇與楚爭強此楚莊所以得志於中國

冬十月楚人殺陳夏徵舒 丁亥楚子入陳

徵舒弑君陳亂公孫寧儀行父愬於楚楚莊為是親  
帥師以臨於陳假討賊之名為逞志之舉先使人殺  
徵舒而遂入陳入陳以丁亥則殺徵舒在丁亥之前  
可知

納公孫寧

公作寧

儀行父于陳

殺徵舒而納二人於陳使復其位楚莊之意以謂有  
罪者討之無罪者復之義聲昭乎與國威靈耀乎中  
夏非我莫能為也嗚呼王政不綱桓文代興已非世  
道之幸陵夷至是南蠻之長得操宰割之柄廢置生  
殺惟其所令而莫之誰何其為變故又豈不甚矣哉  
十有二年春葬陳靈公

孔寧儀行父既歸於陳乃葬其故君赴於諸侯若齊  
魯亦當遣人會之故書於策也會之者以楚故也

魯

於晉而楚方滅強陳靈之葬遂往會焉魯之私與楚通可知不待歸父會楚子于宋始見之也

### 楚子圍鄭

鄭自辰陵受盟而更徵事晉楚莊為是怒而圍之鄭服然後去之鄭自此久屬於楚也

夏六月乙卯晉荀林父帥師及楚子戰于邲晉師敗績鄭事晉而楚復圍之晉不得不與楚爭及晉師至而鄭已從楚若便退師是楚大得志而晉甘為之屈也故議戰非得已也特以離渙之晉遇整暇之楚一戰

而敗遂成楚伯之名此則中國之勢益衰而左袵之憂愈迫晉之君臣不得不任其責耳乃若春秋書之但依事實曲生意義要無取焉

秋七月 冬十有二月戊寅楚子滅蕭

蕭宋附庸滅蕭則禍將及宋矣

晉人宋人衛人曹人同盟于清

晉新喪師於楚而楚之侵陵上國勢方未已其不叛去者僅宋衛諸國猶不能無相猜防故四國之大夫

同盟於清丘以恤病討貳相約誓如此也

宋師伐陳 衛人救陳

楚滅蕭而宋伐陳所以報也宋為中國討陳之附於楚而衛以私好出師救陳背清丘之盟同好之國乍親乍仇此由晉伯之衰致諸侯不相稟承妄動干戈如此

十有三年春齊師伐莒

公作衛

此見齊自伐其鄰國為陵弱暴寡之事而晉楚盛衰

之勢齊若弗聞也

夏楚子伐宋

楚之盛也既得陳鄭必有事於宋宋為清丘之盟而伐楚之與國楚遂加兵於宋也

秋螽冬晉殺其大夫先穀

據左氏討邲之敗與清之師歸罪先穀而殺之也歸罪之云宜有誣枉晉之失刑於斯為其書晉殺其大夫亦見晉德不競威挫於外刑濫於內臣下蒙其殃

矣

十有四年春衛殺其大夫孔達

衛之救陳也背清丘之盟晉以是為討衛人殺孔達以說於晉晉衛皆殺其大夫皆為疆場之事南北交爭其禍烈矣

夏五月壬申曹伯壽卒 晉侯伐鄭

自邲之敗閱二年而後克伐鄭然終不能得鄭者楚方強故也

秋九月楚子圍宋

據左氏楚子怒宋之殺其使者遽興師伐宋圍其國都蓋莊之志必欲以威力服宋如陳鄭故事而後快於心也宋受圍而晉不能救則南北強弱之勢愈可見矣

葬曹文公 冬公孫歸父會齊侯于穀

魯事齊謹而仲遂父子兩世暱於齊於是會齊侯於穀

十有五年春公孫歸父會楚子于宋

楚子圍宋宋必不支宋服則山東諸侯無能自固者矣魯恃齊而不事晉齊楚使命往來即是不絕楚之事魯又內怯欲結強楚以自安故歸父會楚子於宋此見中國衰甚也

夏五月宋人及楚人平

宋之見圍久矣至是二國講和楚師退而宋之社稷民人得以無恙也宋及楚平者宋為楚下以上公而

受盟於楚也春秋書之為主客相當之文蓋扶陽抑陰之志觸事而寓學者當於言外得之人者兼君臣

而言猶曰某國之人云爾

非譏平在下○宋及楚平所謂事闕楚晉盛衰之故

故特書之也

六月癸卯晉師滅赤狄潞氏以潞子嬰兒歸

狄有赤白諸種而赤狄之中有以潞為氏者即潞是其國名晉自十四年伐鄭以後楚圍宋甚久宋告急晉猶不救度德量力不復與楚爭勝而自為闕國之

計滅潞氏而虜其君此於晉之私圖則得矣而天下大勢不能有所扶維匡正於萬一則晉之君臣其功罪亦可知也已晉人來告其辭必詳史臣因而錄之書曰書名皆以是故與

秦人伐晉

秦晉壤地相錯兵力又足相制晉方有事於狄剪除荆榛以廣土疆秦人則從而伐晉矣蓋秦桓公也

王札子殺召伯毛伯

傳以為爭政故也春秋錄之憫王室之無政而東周之不可為也

秋螽

仲孫蔑會齊高固于無

公作婁

蔑賢大夫與齊卿會必非為私然其所謀之事則不可知也

初稅畝

始變取民之制也蓋國用不足定此稅畝之法以濟一時之急後遂循而用之也

冬蝻生

饑公羊無此經

蝻蝻皆旱災也蝻蓋蚘蜉子禾稼有被其災者顆粒無所得收今時或有之周正之冬禾稼猶有在田者而是物為害災重故致饑爾

十有六年春王正月晉滅赤狄甲氏及留吁

赤狄有數種前既滅潞氏今又滅甲氏留吁也不言及則疑非二種故言及以別之也晉人未暇經營中夏而自為闢土開疆之事草薶而禽獮之唯日不足

有如此者

夏成周宣榭火

公作榭災  
穀亦作災

成周者西周之下都也宣王嘗講武於洛邑於是乎  
有榭後因立廟於其所謂之宣榭先儒之說云爾書  
此者猶孟子勿毀明堂之意與

秋郊伯姬來歸

見出而歸也

冬大有年

五穀不同時而登是年皆成熟故於歲終書大有年也宣公之世水旱饑饉洊至而是年豐熟賴此猶可支吾不至於民卒流亡而無以為國也

十有七年春王正月庚子許男錫我卒 丁未蔡侯申

卒 夏葬許昭公 葬蔡文公

時許蔡皆屬於楚而卒來赴葬往會邦交之禮未之或缺也則魯之親楚亦自可見

六月癸卯日有食之 己未公會晉侯衛侯曹伯邾子

同盟於斷道

晉至是復徵諸侯為斷道之會曰同盟者相約誓無  
得攜貳也魯至是始復從盟主令不一意比齊

秋公至自會 冬十有一月壬午公弟叔肸卒

以先君之子言之則曰公子以今君言之則曰公弟  
其實一也叔肸未必不為大夫但不得列於諸卿故  
生時不見策書至其卒乃錄之爾肸之後為叔氏亦

世卿矣

魯國卿數已滿雖君之同母弟豈得  
皆為卿乎歸父絕而叔氏乃得為卿

十有八年春晉侯衛世子臧伐齊

晉徵會於齊而齊頃不至故晉以其不從中國也討之衛使世子將兵代父行事也

公伐杞

夏四月

秋七月邾人戕鄆子于鄆

穀作鄆

甚哉天下之無道至此極也大國陵次國次國侵小國小國又虐微國如邾之於鄆前則用之於會茲又戕之於其國雖魯之於邾或取其地或虜其君受侮多矣然亦豈至若是甚乎鄆之待邾其事不可知正

使無禮之至而邾之肆虐如此其罪惡必不可赦灼  
灼明也若夫王室盛時禮樂征伐自天子出方伯連  
帥奉而行之夫安得有如此之事乎故曰一人有慶  
萬民賴之孔子志在春秋良以此爾戕者賊殺之義  
殺他國之君不得言弑故云戕也書於鄆者記其實  
也

甲戌楚子旅卒

穀作  
莒

楚莊威行諸夏狎主齊盟蠻夷之盛於斯為極其卒

也赴告於魯魯史不得不書聖人因而存之存之亦所以見其義也書子者從其本爵葬則書謚又不得改稱莊公故削而弗錄非必不會乃不書也如楚莊之葬魯人自當會之耳

公孫歸父如晉

魯至是復聘於晉

冬十月壬戌公薨于路寢 歸父還自晉至塗

公穀作檉

奔齊

據左氏歸父與公謀欲因晉人而去三桓及歸父如  
晉而公薨季氏與臧孫共逐仲氏之族蓋追論殺嫡  
立庶之事以其有罪而逐之是其相圖之勢不容兩  
立而舉事有成敗之不同其不忠於公家而各為其  
私謀則一也歸父歸知不可容於魯遂奔齊而仲氏  
亡

成公

名黑肱宣公卒即位十有八年卒

元年春王正月公即位

周定公也繼正行即位禮與文公同

二月辛酉葬我君宣公 無冰

周之二月於時宜沍寒而無冰是過於燠也

三月作丘甲

時議以國威不振由兵力不足故改舊制令邱出甲士益兵以備敵也其制未可臆斷諸家各以意說不曰初者一時作此非定著為令田賦之制當時列國

大都變改魯秉周禮亦復有此紛紛稅畝印甲大失  
先王忠厚之意春秋因魯事以見義王者不作勢重  
難返浸尋變為戰國仲尼所傷實在於此

臧孫許及晉侯盟于赤棘

魯自宣公之末始背齊從晉至是臧孫與晉侯盟蓋  
一意事晉而不復事齊齊若來伐晉當庇我以是要  
之也晉得魯則伯事張故降而與之盟赤棘晉地

秋王師敗績于茅戎

公穀作質

冬十月

王師伐茅戎為其所敗也來告於諸侯春秋因而書之曰王師敗績於茅戎言敗績則戰可知也以王者之師至見敗於戎狄衰替甚矣然既有其事則固無容於諱也諱之則失實而撥亂反正之義亦無由見矣但書之不盡其辭與列國異爾

二年春齊侯伐我北鄙

齊以魯畔已而與晉盟故親帥師來討也魯迫近齊而久為齊弱故輒致侵伐晉魯相隔故雖不事盟主

兵亦不至焉其勢然也

夏四月丙戌衛孫良夫帥師及齊師戰於新築衛師敗績

齊既伐魯遂伐衛衛孫良夫出師遇齊師於新築戰而敗績也此見齊抗衛伯國結怨四鄰為喪敗之因皆亂世之事也新築衛地

六月癸酉季孫行父臧孫許叔孫僑如公孫嬰齊帥師會晉卻克衛孫良夫曹公子首

公穀作手

及齊侯戰于鞏齊

師敗績

魯衛皆事晉而齊伐之故晉為二國討卻克又以私怨求逞其志故合三國之師以加於齊此固期於必戰必勝非苟欲服齊而已三國皆以大夫會大夫專政主兵其來有自至是而更甚焉春秋以內為主故詳錄主將及其佐皆卿也

他國則但書元帥一人

蓋世變則事

變事變文亦從而變非獨此一事為然也孟子曰春秋無義戰彼善於此則有之若此之類彼此皆惡可

知亦不假於異文見義也

秋七月齊侯使國佐如師 己酉及國佐盟于袁

穀作爰

婁

四國既敗齊師師猶不解故齊侯使國佐如師齊雖  
敗衄而已是大國未便降屈求成如師者問所以不  
退師之故亦欲使國佐量事之宜因而行之以安其  
國事在於佐不盡由齊侯之命及國佐盟袁婁與屈  
完相似但楚則不戰而自服此乃既勝而不得不與

之盟以取服齊之名爾書齊侯使及國佐云云者見  
兵威盛能服強齊取成而退也以大夫敵齊侯大敗  
其師受盟而還大夫之專恣亦甚矣

八月壬午宋公鮑卒

庚寅衛侯速卒

公作  
邀

取汶陽

田

袁婁之盟齊歸魯衛侵地歸晉寶器以為賂晉釋齊  
而與之盟魯故有汶陽田今因晉力復取諸齊書取  
汶陽田於盟袁婁下其事自明曰取者言以兵取之

非齊人自歸於我不擊齊者我故物爾

冬楚師鄭師侵衛

齊崛強不從晉而親楚晉合三國伐齊故楚鄭伐衛以抗晉也楚共承莊之緒與中國爭諸侯其勢孔熾如此也

十有一月公會楚公子嬰齊于蜀

伐衛而魯震魯尤素怯故往會楚公子嬰齊請服於楚以紓禍也嬰齊者帥師侵衛之將蜀蓋魯地嬰齊

至蜀是以師臨魯即是侵也而不書者公已往會之  
棄惡從好不見攻掠之端且既書會於蜀則嬰齊之  
至蜀其事為何雖不言侵從可知也背晉即楚其事  
甚惡然爾時列國大勢固已如此所謂堅冰之至與  
履霜者異矣安得盡沒而不見乎楚僭王號而嬰齊  
書公子者與書楚子義同

丙申公及楚人秦人宋人陳人衛人鄭人齊人曹人邾  
人薛人鄆人盟于蜀

嬰齊處於蜀山東諸侯皆望風承服或其君自至或遣臣與會相與盟約以苟免侵陵為幸而已如秦宋陳鄭蓋皆黨於楚前定為此盟故其人皆在焉衛則以楚兵至而請服其餘則視大國所向奔走偕來無足尤也書此盟見諸侯南北兩事晉不能獨有之為世變之大也○楚本為齊而來齊與楚合而山東之國無能自立者不特畏楚亦為諸國近齊齊苟肆其陵暴即旦夕及禍而晉伯方衰政出多門不能速救

故也魯倚晉以勝齊實則心畏之甚故決計與楚盟  
不恤叛晉知晉不能徧責諸侯且晉令及我則又轉  
而從晉如鄭之所為矣故下年遂會晉伐鄭蓋當時  
已不復知信義為何物以視桓文之時相去遠矣世  
道陵夷將何攸底此聖人所以作春秋也

三年春王正月公會晉侯宋公衛侯曹伯伐鄭

衛從晉伐齊而楚鄭侵衛故晉合諸侯以伐鄭宋魯  
衛曹雖與楚盟而楚人既去則仍奉中國伯主非便

背華而即夷如陳蔡鄭諸國之所為也當時楚勢雖盛晉亦不全衰故諸侯盟會之事見於策書者如此然楚一侵衛而十一國從之受盟晉伐鄭而鄭之岷強如故也則南北勝負之勢居可見矣

辛亥葬衛穆公

公作繆

二月公至自伐鄭

衛葬穆公以正月之辛亥蓋伐鄭之師不久解散衛鄭地近故歸而葬不踰是月魯差遠故以二月至爾甲子新宮災三日哭

新宮蓋宣宮也除喪未久時猶目之為新宮遇火而燬之故三日哭事屬非常故記之

乙亥葬宋文公 夏公如晉

除喪朝伯主也

鄭公子去疾帥師圍許

鄭之有許如魯之有邾宋之有曹滕無事猶或侮之矧其不恭焉能免於伐也左氏謂許恃楚而不事鄭故伐之爾時許未嘗從中國故知然矣

公至自晉 秋叔孫僑如帥師圍棘

傳以為棘汶陽邑也魯既取之而不服故圍之未知  
信否也

大雩 晉卻克衛孫良夫伐廡

公作將  
穀作牆

咎如

晉人以治狄為務而孫良夫親於卻克故從之伐廡  
咎如也

冬十有一月晉侯使荀庚來聘 衛侯使孫良夫來聘

晉使之至以公之往朝而答禮也衛使之至以公之

同好而先施也荀庚先至良夫繼來皆在是月書則以先後為序

丙午及荀庚盟 丁未及孫良夫盟

因其來聘而與之盟二大夫不同盟者彼此約誓事詞各異故也先荀庚者晉為盟主雖非正卿猶當尊之內及者公也不言及從可知也

鄭伐許

一歲再伐許書辭從省蓋非其君自將而所將之人

不足復書故但舉國爾

四年春宋公使華元來聘

宋共繼立聘使及魯

三月壬申鄭伯堅卒

公羊本或作取本又云公作姬穀作賢今定本亦作堅

杞伯來朝 夏四月甲寅臧孫許卒 公如晉

三年之中再如晉在魯如此諸侯可知見爾時列國不畔晉也

葬鄭襄公

秋公至自晉

冬城鄆

公作運

說者謂曾有東西二鄆此蓋西鄆云

鄭伯伐許

至是三伐許矣鄭之惡可知也未踰年稱鄭伯者他國史官之辭若會盟則從其所自稱與此不得同也五年春王正月杞叔姬來歸

出妻之事見於書傳者春秋時為多魯女亦多被出

不知以何事出但為內女故錄之爾

明非罪之

仲孫蔑如宋

報聘通好也

夏叔孫僑如會晉荀首

公作秀

于穀

穀齊地荀首在齊而僑如往會之也

梁山崩

山崩川竭變之大者梁山在晉地書梁山即其地已明不嫌似是魯國之山若言晉梁山崩則似此變專由晉興天道茫昧難可質言以謂上自天子下及列國皆當惕懼修省以承天戒云爾

秋大水 冬十有一月己酉天王崩

定王崩亦不書葬蓋王室尤微天王崩葬如弗聞知  
觀下虫牢之盟及取鄭侵宋等事可見矣

十有二月己丑公會晉侯齊侯宋公衛侯鄭伯曹伯邾  
子杞伯同盟于蟲牢

鄭人求成於晉晉復為此會於是諸侯同盟於鄭地  
以外楚為事也

六年春王正月公至自會 二月辛巳立武宮

據左氏季文子以鞏之戰立武宮蓋魯為齊弱久矣  
得大勝齊取故地齊終不能有加於魯今且棄惡從  
好與為同盟由此一戰之力故為之立武宮告成事  
以章武功也僖公從齊伐楚而有闕宮之頌季孫從  
晉勝齊而有武宮之立其情一也而此舉更為非禮  
春秋書之其失彰矣傳曰武宮武公之宮也歷世遠  
矣而更立之非禮明也

取鄆

鄆蓋微國內取不言滅耳

衛孫良夫帥

公作率

帥侵宋

傳云以其辭會也晉欲重會諸侯而宋以內難辭似有背盟之意故伐之衛孫良夫蓋首承迎晉指加兵

於宋

但以宋一辭會而遂命二國侵之似非情理

夏六月邾子來朝

公孫嬰齊如晉

壬申鄭伯費卒

秋仲孫蔑叔孫僑如帥師侵宋

魯奉晉令命二卿帥師侵宋曰侵者非問罪之師侵

掠其境而已

楚公子嬰齊帥師伐鄭

重牢之會鄭既從中國矣楚與晉爭鄭因其有喪而伐之欲令嗣君改事已也

冬季孫行父如晉

左氏謂賀晉遷也

晉欒書帥師救

公作鄭

救鄭之師至而楚師還鄭不屈於楚也故明年復伐

鄭

七年春王正月饑鼠食郊牛角改卜牛饑鼠又食其角  
乃免牛

不言牛死者傷其角爾角傷似天意不欲用此牛故  
改卜牛也又食其角則似非以牛故直不欲享此郊  
祭故免此牛不復更卜他牛也免者釋之也郊廟人  
君所最嚴重故錄之文煩

吳伐鄭

邾山東小國吳於時始盛強兵威及乎中夏春秋書  
吳伐邾亦猶書荆敗蔡師之例也楚吳之強皆前此  
矣事未及中國則無緣錄之至其時則不得見所  
謂不先天以開人者其意與此近也○楚之憑陵諸  
夏極矣晉乃僅足相抗及吳勃興而楚始疲於奔命  
幾至亡國此天道之常而世變之大者

夏五月曹伯來朝 不郊猶三望

麋鼠再食牛角故不行郊祭而但舉其細

秋楚公子嬰齊帥

公作率

師伐鄭

公會晉侯齊侯

公穀無齊

侯今本並有之

宋公衛侯曹伯莒子邾子杞伯救鄭

八月戊

辰同盟于馬陵

楚再伐鄭而晉能大合諸侯之師以救之修伯職也  
諸侯以救鄭出而遂舉同盟之禮前此未有蓋事勢  
至此不得不爾可以觀世變者此也

公至自會

吳入州來

公穀作萊

據左氏晉用巫臣之謀通吳於晉吳之興也勃焉兵

入州來而楚不能禦自是楚腹背受敵重為吳所困而吳之僭恣爭盟中夏亦一楚也事與趙宋時完顏耶律迭興相似楚之後有吳吳之後有越摠之天運人事變而愈甚莫為而為往往如是王者之不作生民之不幸可勝道哉州來蓋楚屬之小國○非為吳能病楚喜而錄之也若曰一之為甚又可再也楚未衰而吳復張矣可懼也哉可憫也哉

冬大雩 衛孫林父出奔晉

孫氏專衛君臣必不相能書林父出奔晉大夫不道  
之迹著矣

八年春晉侯使韓穿來言汶陽之田歸之于齊

鞏之戰晉卻克以齊汶陽田畀魯既而齊事晉謹故  
晉使諸侯前所分地仍予之齊使韓穿來言者伯令  
也曰來言者猶曰晉人之意如此也曰歸之於齊者  
我歸之也雖晉人有命而其事固在於我也此為尊  
內之文然則何不言歸汶陽之田於齊乎曰其實非

我欲歸之固不得而沒其實也若言齊人取之則齊  
未嘗強取之有此二端書辭所以特詳與

晉樂書帥師侵蔡

春秋闕如編卷七

欽定四庫全書

春秋闕如編卷八

金山焦袁熹撰

讀春秋附

元年春王正月

隱公

左傳元年春王周正月不書即位攝也杜預註云隱公之始年周王之正月也凡人君即位欲其體元以居正故不言一年一月也隱雖不即位然攝行君事

故亦朝廟告朔也 言周以別夏殷假攝君政不修

即位之禮故史不書於策傳所以見異於常 公羊

傳王者孰謂謂文王也公何以不言即位成公意也

何休註云不言謚

文王之文

者法其生不法其死與後言

共之 穀梁傳雖無事必舉正月謹始也公何以不

言即位成公志也范甯註云謹君即位之始 程頤

傳云周正月非春也假天時以立義爾隱公自立故

不書即位不與其為君也 胡安國傳云正次王王

次春乃立法創始裁自聖心無所述於人者非史策  
之舊文矣以夏時冠周月垂法後世以周正紀事示  
無其位不敢自專國君逾年改元必行告廟之禮國  
史主記時政必書即位之事而隱公闕焉是仲尼削  
之也內不承國於先君上不稟命於天子云云首絀  
隱公以明大法 張洽集註云天統以氣為主故月  
之建子即以為春

不書即位  
說同胡氏

愚按天子諸侯逾年改元自始立之年數之實第

二年也不忍奪先君之年故以次年之正月朔日告廟行即位禮以為己之元年元年即是一年其取義則體元之說是也春秋是魯史當隱公始立逾年之期史書元年矣周以建子月為歲首以子丑寅之三月為春朝廟告朔實在建子之月故曰元年春也魯史之文不得書周王之某年而所奉者周王之正朔以子月為正月是時王之制故曰王正月也公羊所謂大一統是也此蓋史書之正

法魯國之舊章何者以尚書元祀十二月之類推  
之或但書月而時自見然魯史舊題為春秋則編  
年必書四時元年春正月五字無可異同唯王之  
一字有無不可知然爾時周猶頒朔諸侯皆  
奉正朔在於齊晉諸國其史臣不必南董之流亦  
未便目無共主不知書此王之一字也豈况魯秉  
周禮而弁髦周室蔑棄先典既知有王則不容不  
書春王正月而顛倒更易於其間矣但未經聖筆

之前雖有王正之文實不足以見尊王之義故曰  
其文則史其義則竊取之也聖人雖襲舊文不害  
為變革之大者惟其義而已矣豈必奮筆置辭如  
天王狩於河陽而後謂之竊取哉胡氏之云蓋未  
見其必然也春王之王即周之平王獨公羊以為  
文王者何氏釋之使其通於後王意謂凡是繼文  
王之體守文王之法者雖百世若一人然故曰謂  
文王也蓋元年春王正月之六字既是史策之常

例則惠公以前莫不皆然所謂王者隨世所值各有其王桓元年之王是桓而非平莊元年之王又是莊而非桓矣然則創立此六字之意不得鑿定為何王既不得鑿定為何王故以始受命之王統之非無說也若以隱公此年之王指實而名之其為平王又何惑乎哉隱公以奉桓為太子而已特攝君行事不欲終為君故不行即位之禮史臣因不書即位所謂公即位者公行即位之禮非至此

始成君也

嗣子繼君位在初喪時已定矣見書顧命天子既然諸侯亦同之也杜君云諸

侯喪五日而殯殯則嗣子即位是初喪謂之即位也豈逾年再即位乎

不書即位非

謂不即君位不成為君也三傳之說畧同獨程子

以為不與其為君而胡氏張氏因之皆謂舊史本

有公即位之文而孔子削之愚尤未有以見其必

然也所謂攝者身暫為君終將退閒非實不為君

徒以代行君事若冢宰聽政而名之攝也歐陽公

駁之謂隱非攝者不深考三傳之意爾

元年春王正月公即位

桓公

杜云諸侯每歲首必有禮於廟諸遭喪繼位者因此而改元正位百官以序故國史亦書即位之事於策桓公篡立而用常禮欲自同於遭喪繼位者公羊繼弒君不言即位此其言即位何如其意也穀梁桓無王其曰王謹始也元年有王所以治桓也繼故不言即位正也繼故而言即位則是與聞乎弒也范云諸侯無專立之道必受國於王若桓初立便以見

治故詳其即位之始以明王者之義 與弑尚然况

親弑者 程子云以天道王法正其罪 胡氏云著

其弑立之罪深絕之

張註  
意同

愚按春王正月之文既是史家之常例桓繼隱為  
君史亦依例而書聖人因而不革也以天道王法  
治桓不天無王之惡理則然矣謂聖人設心措意  
必假此字以著明之則不然也何者桓不天而無  
王聖人雖不言天言王其所以治而誅之者自在

天與王之有亡豈關於言之有亡也須知如桓等  
惡人但立此春王正月之文便自有受治受誅之  
理其義益顯前者為魯史之詞則氣力微輕一旦  
經大聖人之筆削即震霆蕭斧之威不加於此故  
曰春秋成而亂賊懼者以是故也凡繼故而立者  
雖逾年改元不修即位之禮猶遇災不受朝賀所  
以仁惻於先君故特異常禮以自貶損者也隱繼  
惠立可以即位而不即位為將讓桓故也隱被弑

而桓立桓應廢即位之禮而不廢何邪蓋鍾巫之  
事桓實主使翬乃下手之人當日翬為桓謀歸獄  
寯氏誅一二人以了其案必是曲為之辭謂寯氏  
之人以細故致此禍變隱或身自取之若齊莊命  
姜之類故亦不正明寯氏之罪赴告天子及四鄰  
諸侯不謂我大夫寯氏有此弑逆之惡也蓋直以  
暴卒等情告矣寯氏且不明受弑君之名則翬猶  
脫然為無罪之人而桓更不待言矣於是焉而改

元告廟臨御受朝便乃自同繼立之常所以泯其  
繼故之迹固亦不得而不然也矣史官是其臣內  
大惡諱見其行即位之禮安得不據實而書公即  
位乎史既據實書之聖人亦因而不革也夫以桓  
之弑兄自立而又強自同於常禮似若魯初無此  
變故然者聖人但因舊史之文而著之則桓翬之  
惡不待別加誅絕之文而固已揭其肺腑於千百  
載之下矣若曰聖人深惡之故特書其即位以寄

我意則豈有此等之人而疑於可惡可不惡之間者哉亦無用此深文為矣

元年春王正月公即位

宣公

公羊繼弒云云何其意也註桓篡成君宣篡未踰年君嫌義異故復發傳穀梁與聞乎故也 張罪同桓

愚按桓弒立十餘年之成君而君臣輩曲加揜蓋

自同繼正故有公即位之文宣為仲遂所欲立遂弒子惡及視而立之惡之立八閱月矣未逾年故

稱子宣於已逾年改元之日仍行即位禮者意謂此二孺子去之則已之立繼父不繼惡若明燕王之革除建文帝而自謂嗣太祖也然則文公正終已固居然繼正矣於是焉而行即位之禮也仲遂與宣公豈不知閔公之事繼未踰年君同於成君耶顧以謂苟依此禮即已殺惡之罪不可諱故不得不如是而行之矣此與桓翬事畧同而心意亦正同也若以宣志在於為君故如其意而書即位

以惡之假令宣矯情飾偽不行即位之禮春秋自  
不得著如意之文豈便謂宣無此意也說者又謂  
是聖人絀之不與其為君然則可作此說可作彼  
說莫如春秋一書矣惟其情事如上所說雖欲矯  
情飾偽廢即位之禮有所不得故史氏據實而書  
聖人依舊文錄之因以著與弒貪位不問國賊而  
以為德有如是之甚惡也

元年春王正月

莊公

左傳元年春不書即位文姜出故也杜云文姜與桓俱行而桓為齊所殺故不敢還莊公父弑母出故不忍行即位之禮 公羊春秋君弑子不言即位隱之也胡氏內無所承上不稟命春秋絀而不書以正父子君臣之大倫 張氏無志討父仇而泰然居之故削其即位

愚按桓之行即位禮說已見前矣莊之異於桓者正以父見殺於齊齊為之殺彭生母文姜實作之

孽至羞畏不敢還莊之繼故不啻家諭而戶告之  
此所以不行即位之禮而史不得書之也莊所以  
然者父弑母出而母出由于父弑則固以父弑為  
重當如公穀二家之說矣左氏獨云文姜出故也  
者欲見莊公小孝徒有念母之誠竟忘天不共戴  
之義所謂繼故不忍者特其文而已耳然同一不  
書即位自魯史舊文而言或但如三家之說見隱  
痛之至情自孔子之春秋而觀則如胡張所說之

義皆在其中至公至嚴至平至恕不可以一辭而蔽之蓋所謂貌同而心異有如是者也其內無所承之云愚別有說茲未暇焉

元年春王正月

閔公

左傳不書即位亂故也杜云國亂不得成禮 公羊  
繼弑君不言即位何云復發傳者嫌繼未踰年君義  
異故也明當隱之如一 楊士勛穀梁疏云以非父  
非君嫌異故復發傳以明之 胡傳莊覺子般卒慶

父夫人利閔公之幼而得立焉是內不承國於先君也魯有大故不告於周閔既主喪而王不遣使是上不請命於天子也 張云不書即位亦所以累齊桓也

元年春王正月 僖公

左公出故也杜國亂身出復入故即位之禮有闕

公羊明臣子一例 張責齊桓不請命天子

愚按莊閔僖三君之立皆以繼弒不修即位禮故

不書即位其例並同閔之立也幼未有知仁恩先  
君以否非所得與其事則慶父主之左氏記其事  
故言由國亂故也公穀言其義明所繼者有故則  
並當隱痛之不得行即位之禮也僖出奔復還改  
元朝廟之日即位禮缺而不備亦是記其事也三  
者皆非聖人削之其不得言諸侯嗣位無庸稟命  
先君天子則張氏所謂反經之學豈有不宜講明  
者但謂仲尼削之以示意則非事實爾

元年春王正月公即位 文公

左氏無傳杜云先君未葬而公即位不可曠年無君  
孔穎達疏云即位必於歲首若歲首不行此禮餘月  
不得行之便是曠年無君 穀梁繼正即位正也

愚按諸侯繼正逾年改元正月朝廟即位禮序首  
官然後反凶服史書元年春王正月公即位已具  
說於前矣自隱以來凡六君至此始合其例然猶  
未及先君葬期不為譏者以其即位必於歲首若

遲至葬後則須再逾年然後得行是曠年無君非  
事之宜故從權而行之也成襄昭哀四公從同無

說

從同不蒙  
未葬文

成元年張洽云雖無王命而有父命

故書愚有說見後

元年春王夏六月癸亥公之喪至自乾侯戊辰公即位  
定公

杜云公之始年而不書正月公即位是在六月故諸侯  
薨五日而殯殯則嗣子即位癸亥昭公喪至五日殯

於宮定公乃即位 胡氏不書正月見魯國無君定  
公無正昭之薨定之即位詳書於策為永鑒

愚按昭定之際國事之變而又變前此未有何休

以桓莊之際為比不知其不倫也

楊士勛言桓薨  
之詳矣

於齊即以是年喪還且葬矣嗣君之位定已久矣

然後逾年改元特以不忍行即位之禮而不書即位  
且昭以見逐故薨於乾侯其薨也以十二月外  
內莫適為主至明年正月既不得蒙死者之年則

此之元年未有屬也直至夏六月昭之喪始還越五日而定乃即位然後追而正之以此年為定之元年故但書元年而已以喪至之日為始死之日戊辰之即位乃嗣君初喪定位之事非諸公春正即位備禮之即位也但昭之薨既已隔年不得以此年為始薨之年而明年正月行即位之禮實則定之二年春王正月如莊之元年不書即位而勢又不得也蓋國事之變進退失據無可奈何春秋

據事而詳錄之書其從來所不書之即位以當春  
正即位之即位此變例之不得不然者因其變而  
變之也若併此不書則公子宋之為君從何來乎  
乃若元年春王之文愚獨以為但書元年而已者  
下方三月晉人云云春秋策書首行書元年二字  
次行春王三月晉人執宋仲幾云云按公羊疏云  
三月有王者  
即定元年王三月之屬是也則不書正月亦若五  
春王屬下三月先儒固亦有之  
年之春王三月云云爾非是聖筆於元年下獨書

春王二字似脫似削駭人觀聽也愚故曰但書元年而已春秋此條所以為求鑒者所謂其所由來者漸矣至此而誅絕之所謂未如之何也矣繼故逾年所以必書春王正月者為不即位故也定未定為嗣安有不即位之事故不書春王正月也其所以書春王三月晉人云云者天不變周不亡書春書王何為不可乎魯未有君本國之事不得而書執宋仲幾者他國來告故得書之也既有此一

事便不得用無事書首月之例而說者遂以為定  
不正始故去正以絕之假如此年二月三月無事  
可書則當仍書春王正月而去其正月以明之然  
夏六月既有戊辰公即位之文則於元年之下雖  
等書春王正月亦自與他繼故不即位者有別而  
其義則愈晦而不顯矣聖筆特裁難可億測聊為  
論之以俟達者 又按隱莊閔僖之元年無首時  
無事者假或有之則春王正月之文自為不書即

位而發其無事書首月之例當在所輕矣

三年春王二月云云

隱公

七年春王三月云云

隱公

何休云二月三月皆有王者二月殷之正月三月夏

之正月也王者存二王之後云云 范甯云文表年

始事莫之先所以致恭而不黷者 程傳事在二月

書王二月在三月書王三月無事首月蓋有事則道

在事無事則存天時王朔天時備則歲功成王道存

則人紀立春秋之大義

愚按春秋編年四時必具春王正月四字之文施於繼故之元年者不即位即其事也其施於二年已下者無事書首月也莊五年是也正月無事而二月有事則書春王二月某事云云即此二月是為最先之文隱三年是也二月仍無事而三月有事則書春王三月某事云云即此三月之文猶為最先隱七年是也范云事莫之先者此也道時過則有書矣豈有書夏王四月之事乎然則何氏三

統之說委是傳會之談非經意也

二年春云云

隱公

八年春云云三月云云

隱公

范云春秋記事有例時者若事在時例則時而不月  
月繼事末則月而不書月

愚按時而不月即二年會戎五年矢魚之屬是也  
月而不王即八年三月歸祊上有遇垂之文僖二  
十八年三月丙午晉執曹伯繼上楚人救衛之事  
是也公穀二家以日月為例孔穎達為左杜之學

直欲一掃而空之竊謂此例亦非全有說具別卷  
難可立談而盡者闕所不知惡為其鑿斯近之矣

秋七月隱六年

杜云具四時以成歲也 公羊春秋雖無事首時過

則書春秋編年四時具然後為年 何云明王者當奉

順四時之正 穀梁不遺時也

四年桓公 七年桓公 秋冬二時俱無文

杜云不書秋冬首月史闕文何去二時賤范未詳程

子胡氏張氏俱同何意

十年

昭公

十四年

定公

俱不見冬字

杜云少闕文 何去冬貶

愚按四時具為年者每年之中春夏秋冬四字必全見其文此史書之定體故雖一時無事而空書首月若隱七年之秋七月重在秋字不重月月則有不見者矣首時過則書者孟月仲月無事未便得書必待季月盡然後追書首月如大無麥未必

待無未然後連麥書之也既是史書定體孔子因而不變獨桓之篇兩年無秋冬二時先儒遂以桓惡人之故謂是削其空書六字以深著貶絕之義以桓之惡受之安得辭乎然而使聖人間之恐當啞然一笑何也舊史有闕聖人不復補亡是則聖人目覩其然無意無必也或由門徒授業傳寫有所漏畧是又聖人不意其然愈非我事也今乃適於桓之篇見之且不一見而已遂作是解謂其必

然此譬如春霆偶發語某子之為惡者曰天謂予  
言欲擊汝焚汝而不聞之轟轟然乎者也夫是非  
矯命也然而亦是矯命也桓無秋冬二時於桓之  
身亦復何損正使全具四時而誅絕貶責之義豈  
有不炳炳麟麟見於行間者也待必削其二時然  
後乃足見意則亦淺之乎為聖人矣故惟此段經  
疑惟杜氏為得其實矣

春秋闕如編卷八